

頤
道
堂
詩
選

顧道堂詩選卷三

古今體詩

泰山道中望徠山懷古

屹屹徠山足與泰山抗
名山如高人遠引勢相讓
吾憶孔巢父結廬託青嶂
六逸踰七賢天機各清曠
就中謫仙人胸襟最豪宕
至今五言詩雲霞發高唱
吾憶石守道生平懷直諫
慶歷聖德頌褒貶及時相
邪正辨必嚴忠信道可仗
至今讀書堂遺址尙無恙
我不見古人高風託遐尙
古人不見我亦復同惆悵
雲影空徘徊泉聲自淒愴
日暮青松陰紫翠非一狀

望新甫山新甫山一名宮山漢武帝建離宮於此

蓮花高出白雲間漢武仙臺未許攀青鳥不來花落盡更無人解說宮山

梁父吟望梁父山作

君不見諸葛梁父吟二桃殺士悲填膺又不見李白歌陽春兩龍會合如有神古來萬事若流水天猶可補心難平泰山何高滄海何下白日何朝明星何夜人何爲而升沉世何爲而代謝浮雲蓬蓬從西來七十二君安在截金繩玉簡盡塵土春草綠上登封臺吾欲排浮雲登青天乞神丹希長年秦皇漢武已寂寞蓬萊清淺成桑田何況太倉渺粒粟妄思日馭停羲轡天門冥冥起風雨貔磨牙虎

豹怒珊瑚已折白石爛獨歟精誠且歸去

涿鹿昭烈帝廟

漢家原廟晚蒼蒼春社雞豚父老忙終法高皇定西蜀眞
同世祖起南陽桓侯故里風雲近丞相祠堂道路長此是
眞人舊豐沛亭亭羽葆問樓桑

燕昭王求仙臺遺址

碣石宮荒蔓草煙昭王當日此求仙心殷駿馬高賢外事
在秦皇漢武前易水風寒秋瑟瑟滄波月落夜娟娟蓬萊
玉女應無恙問到人間一惘然

四川營是明秦良玉屯兵處

秦良玉忠州人石砭宣撫使馬千乘妻初從征播

州扼賊鄧坎破金筑七寨爲川南戰功第一千乘
死代領其衆良玉僥膽智善騎射兼通詞翰所部
號白桿兵爲遠近所憚泰昌時徵其兵援遼左良
玉遣兄邦屏弟民屏往邦屏戰死良玉自統精卒
赴之兵部尙書張鶴鳴上其功歸舍崇明黨樊龍
反結援良玉斬其使率民屏及邦屏子翼明拱明
扼要敗之崇明聞成都急良玉兵至圍解崇禎三
年永平四城失守良玉奉詔勤王召見平臺賜詩
褒美畱翼明以萬人護築大凌河良玉歸專辦蜀
賊敗羅汝才於夔州擒副將天時督師楊嗣昌盡
驅賊入蜀川撫邵捷春守重慶良玉策其必敗是

年扼張獻忠於竹箐坪時張令戰死良玉亦敗乃
單騎見捷春請發峒卒二萬自廩其半以辦賊捷
春不能從獻忠盡陷楚地將復入蜀良玉圖全蜀
形勢上之巡撫陳士奇請守十三隘士奇不能用
復上之巡按劉之勃許之而無兵可發十七年獻
忠破夔州良玉馳援衆寡不敵潰及全蜀盡陷乃
慷慨語其衆曰吾兄弟二人皆死王事吾以一孱
婦蒙國恩二十年今不幸至此其敢以餘年事逆
賊哉賊徧招土司獨無敢至石砬者後獻忠死良
玉以壽終明史入總兵傳據國朝沈受祺詩則
良玉乃戰死受祺爲詩人歸愚尙書之祖與良玉

同時所紀或較可信又良玉先後賜三品服進二品服封夫人授都督僉事充總兵官近見國朝人祭文結銜則稱明少保前軍都督府都督同知石砭宣慰使忠貞侯傳聞異詞存以候考四川營在順成門外虎坊橋東或勤王時屯兵之所也

虎坊橋北城南路萬瓦魚鱗擁春樹居人指點說前朝曾是將軍駐兵處將軍玉貌更無倫南國蛾眉舊姓秦幕府別開唐貴主傳車爭迓洗夫人家總州兵作宜撫才大能文復能武袖裏兵符八陣圖威行溪峒諸蠻部小隊饒歌舊有聲播州當日早從征紅妝婉嬋三千騎白桿縱橫十萬兵徵兵萬里拔遼左驛路東來嚴埃火寶劍腰橫白

玉勒毆袍甲絡黃金鑠水急渾河白浪迴桃花馬上繡旗
來冬衣恩重殘兵泣夜月魂歸戰骨哀榆關葉落霜飛野
行軍誰似將軍者能表忠臣一片心中朝祇有張司馬奢
家小醜肆跳梁斬使焚書氣激昂三戰先登復重慶兩河
扼險守瞿塘天上丹書褒敵愾弟姪遷官子宜慰登壇揮
涕感君恩一家骨肉都華貴四城翊衛重巖疆一夜千山
獵火光驛騎星飛馳羽檄詔書十道促勤王將軍奉命先
諸將掃境從戎森一作橫甲仗毀家慷慨見孤忠更罄私財佐
軍餉平臺召見學山呼多少須眉覺媿無御製新詩示褒
寵丹青勝畫美人圖玉帳連營此間駐號令嚴明嫺節度
振旅重看劒閣銘留兵仍護凌河戍祇憂蜀事已披猖巴

閭閻巫盡戰場空有奇謀上劉邵頗將苦戰扼羅張竹節
坪前空壁壘老將艱難中流矢鎗急梨花不解圍全部義
軍同日死峒卒猶堪二萬餘頗教半廩給官精庸才不識
籌邊計太息空陳全蜀圖十三家賊縱橫走十三險隘誰
堪守督師驅賊果何心殘疆獨力支孱婦巾幗蒙恩二十
年弟兄戰死令名全可憐帝室金甌固不及兒家石柱堅
請纓遺恨仍逋寇寶刀戰血臙脂繡莫將蜚語污貞心當
筵曾裂鴛鴦袖 聖清啓運翼震中史局編摩屬鉅公佳
傳一篇名將讀士司列女可能同當年曾記瞻遺像鳳眸
玉照天人樣英雄第一女將軍惜教未盡雲臺上仙館開
尊賦錦袍燭花紅照陣雲高風流最是吳郎句

謂蘭傳唱

揚州譜玉簫子孫聞徙南昌住
檠戟家聲改韋布尙畱殘
軸壘空箱英姿麗色還如故
板渚磯邊春水生樓船東下
太橫行至今重過屯兵地
添說征南舊姓名

重至太僕寺街舊寓

飛鴻蹤蹟又重來疲馬衝泥太僕街
澹墨尙畱曾畫壁苦吟猶認舊書齋
夜燈如夢紅窺影春草多情綠上階
別後相逢知更長月中疎影認雙槐

憫忠寺懷古

細雨清遊塵春晴媚
寥廓啼鳥催喚人步出城西郭梵宇
深綠中遠風振檐鐸一徑入招提
幽寂勝林壑唐宗昔代隋雄心啓
疆索遼東高句麗勢欲風掃籙萬骨
久已荒寸

土竟難拓巍巍哀忠墓鬼雄啼毅魄薦福起琳宮莊嚴燦
璫珞仗彼佛力慈懺此兵劫惡阿鞞起范陽中原肆驅掠
賊部將皆蕃府兵騎不彌張生爾何人貢諛吁可嘆差喜
蘇靈芝筆力尙不弱碑字書唐年痕蹟驗斧鑿五代地入
遼文獻頗寂寞傷心趙官家北來此棲託燕山宋忠臣卻
聘甘鼎鑊一死繼文山大節定無忤京師佛刹多久者遼
金作惟此蹟最古老訂助該博憑弔千餘年斜陽上高閣
花露滴春衣清磬松陰落

憫忠寺弔謝蘆山殉節處

文山死後蘆山來古寺蕭條掩綠苔卻聘書詞原激烈讀
碑心事更悲哀紅羊劫換終滄海朱鳥魂歸又釣臺愁絕

孤臣殉節地松篁祠宇幾時開

春日過西苑經金輦玉竦橋望瓊華島

三海迴環御舫通瓊華仙島畫屏中
鏡橫曉影澄潭碧花
壓春陰隔苑紅石壁何人譚艮嶽
金人取艮嶽奇石所成金源當日
此離宮妝臺廢後琳宮起白塔鐘聲暖遠空

瓊華島訪金李元妃妝臺遺址

春陰不醒瓊華島太液波明寫清曉
妝臺殘礎認金源元
妃遺事猶堪道妃家仙李舊蟠根
花樣風流玉樣溫編籍
自憐監戶女呼名初入玉華門
讀書早歲師宮教隔紗幮
字神光照鶯聲嚶嚶最聰明
尋常女伴難同調道陵當日
慶昇平射柳看花最有情
偶向玉釵邀一顧便將鈿合訂

三生絕代芳姿貌傾國專房常在君王側果然一月日邊
明小星三五無顏色當年此地起層臺玉匣雙花對鏡開
新製御團張遇墨至尊親擅畫眉才君王避暑芙蓉殿定
教同輦揮宮扇聞道城南有葆臺虹廊霧閣爲妃建眉石
山前起御莊溫泉春水自生香玉蓮花白凝脂滑不數華
清第一湯可憐恩重春無價翠帽珠衣陪法駕最憶香山
從獵辰難忘芳苑觀燈夜宸章綺麗詠朝霞富貴惟應帝
子家三十六宮簾盡捲出羣終讓牡丹花景風門外高禰
祀前星誕育君王喜度僧設醮福空祈御憐如意匆匆死
外家兄弟太承恩節度威嚴少府尊涕泣不聞椒殿詔漢
朝寶霍詎同論君心久正中宮位無端偏阻羣臣議多事

伶官玳瑁頭鳳皇向裏空嘲戲一朝龍去鼎湖涼定議黃
門立衛王承御懷娠先帝意彌留遺詔尙煌煌欽意新王
恩誼缺冰紋三尺蛾眉絕九泉祇合怨完顏長門冤獄何
年雪有人飲泣早爲厄符說鴛鴦事豈知應悔殉君遲一
死彼人名字喚師兒野史亭空陵谷變瑤池瀛嶼今難見
酒家空說壽安樓佛寺誰尋廣寒殿誤說妝臺舊姓蕭詞
人憑弔亦無聊十香詞冷迴心院一樣深宮怨寂寥紅心
草長臙脂溼玉鉤何處尋香陌荒臺畱得迴賢詩廢苑鶯
花悲燕麥白塔鐘聲叩夕曛尙餘殘夢弔行雲西華潭水
明如月曾照當年擁髻人

答孫蓮水吳蘭雪西湖早春見懷之作

如畫西泠好放舟
新篇鄭重寄書郵
遠煙竹樹尋僧舍
殘雪梅花問酒樓
知己何堪成久別
名山難得是清遊
感君觸景沉吟處
俱是詩壇第一流

下第後作

袞袞看人步帝衢
龍門原有暴腮魚
敢緣識字思干祿
未得還山且讀書
明鏡芙蓉空復爾
豐臺芍藥定何如
自憐文采非麟鳳
未是王家結綢繆

寄琅嬛仙館諸故人

宮體詩成感杏花
餞春誰與話天涯
姓名脫口羅昭諫
歲月驚心鄧仲華
夜雨蕭騷頻憶舊
暮雲迢遞正思家
遙知草長鶯飛處
綠徧湖南萬畝斜

長春寺九蓮菩薩像

慈雲縹緲香霧遮千佛繡徧紅袈裟玲瓏妙髮結瓔珞前身九朶青蓮花城南古刹長春寺曾是當年布金地東風吹我入招提一龕閒話前朝事前朝遺事說昭陵妙選深宮異色升仙李蟠根滋湛露芳蘭徵兆毓前星前星如月輝東斗合向璇題署堯母大號先頒皇貴妃小心祇事中國后敢忘先皇顧命辭教成聖德母兼師關心東閣經筵日嚴訓西城曲宴時卷簾不冒千朝政政事都由相公定四十餘年海宇寧外有江陵內慈聖鄭妃擅寵過邯鄲奪嫡陰謀漸有端問到諫臣何事謫慈顏一怒國儲安閒來慧業參因果結趺學向蓮臺坐夢裏傳經悟宿因貝多錄

徧青綾裏參透天龍一指禪世宗家法換求仙翠冠舞鳳
宮妝卸紫竹飛鸚妙諦宜景命殿基臨滌水鍾祥人識銅
龍里煌煌御筆紀穹碑仁祠靈宇東西峙宮中隆德殿西
隅間有菩提樹兩株曾是慈闈親手植黃花開落子成珠
瀾空花雨飛飄忽妙相莊嚴輝滿月畫院何人善寫真煙
雲幻出丹青筆外家恩寵武清侯戚畹班中第一流聖孝
推恩頒賜溥卅年富貴更無儔閣臣密進籌邊策借餉臣
工先外戚父子流離家業空賣帖零丁題賜宅人天迢遞
兩茫茫菩薩慈悲亦自傷彷彿空中還示現至今遺恨悼
靈王一代興亡如轉轂麥飯蕭條悲社屋劫灰消盡佛無
靈蕭寺何年畱玉軸春雨依然長綠蕪冬青寒食愴啼烏

金銅寶塔成今昔綠刺觀音尙有無同人頂禮瞻遺像過
眼風燈各俯仰玉題錦障紀重裝老輩題詩溯唐蔣別有
琳宮郊墅邊天吳紫鳳象巍然逖思同訪香雲閣更熟胡
香拜九蓮

將出都門查澹餘比部兄招假館

曲江紅杏避驂駟旅食京華動客愁高誼感君吟適館羈
懷慰我賦登樓烏棲綠樹心難定燕借雕梁蹟許畱回首
家山天樣遠高堂夢後夢瀛洲

寓齋近仙露坊是宋宮人餞汪水雲處

海門風起寒潮急六宮花謝嬋娟泣抱琴供奉入燕來淚
絲彈入冰絃溼掩抑冰絃幾斷腸家山何處恨茫茫十年

辛苦依瀛國一曲離騷感世皇半壁殘疆已如此燕山披
髮文山死琴師尙許戴黃冠何處蒼涼弔天水八月秋風
塞草肥幾行征雁向南飛夢魂已過黃河去心戀君恩未
忍歸藍溝折柳春明饒分韻詩題水雲硯天荒地老別離
難他生或者能重見腸斷蛾眉十七人傷心最是舊宮嬪
青天何處江南月玉骨他年塞北塵萬重香雪孤山樹蹇
驢短策君歸去玉琴三弄弔芳魂西陵風雨錢塘路落日
錢塘憶故都當年宮殿冷西湖六陵寂寞金鳬山愁煞冬
青叫夜鳥玉缸春酒蒲桃熟陽關三疊秋雲裂花滿貂裘
玉帳寒茫茫一片燕山雪君不見木波憔悴寫秋懷問訊
梅花幾度開惆悵黃金臺下客此生應是不歸來又不見

獨夜悲歌寒月小
昭儀埋玉金姬老
都是當年餞別人
玉樓燈火悲芳草
吁嗟乎一代興亡付劫灰
趙家殘局總堪哀
琵琶聲斷蘆笳起
莫唱玲瓏一翦梅

書楊蓉裳農部芳牋伏羌守城詩後

農部詩格騷壇雄
長城不受偏師攻
一官萬里遠乘障
孤城卽是隗囂宮
邊牆縈青塞山紫
城頭遠落千芙蓉
劉琨坐嘯感秋戍
龔遂按部安春農
豈知花門有遺孽
連雞伏莽如孽蟲
妖狐夜嘯薩摩寺
詭託葉護馳邊烽
始由海城達靖遠
出蘇濟惡若駟強
誰與騎鹿鹿竟走
蕭關馳突如奔猱
高廟山前斷鼓角
馬營監裏交戈鏖
將軍死綏尉死邑
百里夜達狼煙紅
天門石鼓先告警
雞聲夜半驚兒童

長圍北來竟環築連營霜雪交臨衝勢欲吞此一城去陣
雲黑壓千山濃君於此時最慷慨登陴誓衆何雍容謂此
當陽本嚴邑障蔽秦隴交河潼頓兵堅城賊計左保障宜
效睢陽忠不計血戰計死守衆志搏作丸泥封婦女負戶
夜出汲丁男荷戟朝登塼蜀營夜警魏客縛晉市不蘇秦
謀空釜蓋作盾旣裹甲竹枝礪箭桑彎弓每發一矢斃一
賊羯末猿臂穿楊工盱眙飛檄據賊質疏勒煮鑊誓耿恭
輸攻墨守幾晝夜鐵星方略驚羣凶援師剽勁頗力戰內
外夾擊驅靈靈九重連夜下丹詔上相受命爲元戎
福侯海侯盡英傑金川青海銘前功禁旅已聞出鄯善叟
兵又見來巴賈狼奔豕突夜驚竄虎落負嵎蟠石峯此堡

自昔屢攻戰哥舒戰績書神龍天戈所奮尤迅厲重圍夜
合森千重飛走路窮樵汲斷柴拾穴掃煩祝融巖城障蔽
績尤懋不然滋蔓甘涼東全城之功尙其次銘勳直合天
山礪大府飛章列功狀璽書褒諭資酬庸紀事詩成幕客
和皇甫濡筆序太沖傳來萬里荒徼外豈知七日陷城中
我讀此詩二十載慕君治行如文翁今來把臂鳳城陌珠
玉吐咳雲霞胸君家令弟才更好遠逐騾騎銘螭嗣愛而
不見碧雲暮鳳池新詠雙青桐長篇手題更自念名場太
息方漂蓬

苦雨紀事

繩雨刀風日夜狂真疑昏墊到洪荒九衢浩浩無乾土萬

戶陰陰有壞牆婦子傷心殘骨肉豐凶彈指小滄桑自憐
涕淚悲飢溺不爲愁霖賦斷腸

怒決渾河勢未平無端災劫付蒼生驚心牛馬都歸海得
勢魚龍欲入城慘澹哀鴻飛四野淒涼新鬼哭三更金隄
鞏固何人事滿眼流離有哭聲

溝洫河渠次第修詔書寬大維親籌太倉發粟恩原
薄內府頒錢虛更周諸將西征猶轉餉長河東下正防
秋三公變理眞辛苦宵旰還勞聖主憂

秋日龍見南海子詩以紀事

雷聲虺虺重雲深淫雨十日成秋霖渾河水溢潞河漲蛟
螭起陸行駸駸大紅門前南海子澤數汪洋三百里中央

深處龍所宮鱗甲軒然此中起或云遠自張灣來龍身所
過河形開噓氣成雲沫成雨揚鬚噴鱗非凡才吾聞神龍
黑白各有靈祕魔崖下潭水腥容臺典禮重零祀天上更
有蒼龍星震鼎懷柔咸率職過則爲災神是責誰驅積霧
掃陰霾一夜龍池飛霹靂災黎四野蜚哀鴻金吾設饗下
九重禦災捍患古有訓好收沴氣迴蒼穹

送吳穀人祭酒

錫麒

乞養歸錢塘

鳳城楊柳晚蕭蕭餞別旗亭酒一瓢杜老新吟洗兵馬襄
陽歸計狎漁樵初鶯北郭開新社殘月東華夢早朝到日
北堂應健在觚稜閒話暮雲遙

紀夢

白雲無際畫檐浮簾捲蛾眉兩點秋夢裏不知身是客滿
天風雨獨登樓

英吉利國定北鍼歌

英吉利乃在紅毛之西荷蘭之東仰視南極出地三十六
六是耿耿天當中製作鍼神定方位萬里洋程作標幟作
者前身定一行囊底七星緯經緯吾聞涿鹿之戰風雲酣
元女下教陳兵南畫尤解作五里霧黃帝作車爲指南昔
人南指今北指舶趙風輕雲路駛爲仰中華斗極邊沙漏
無聲三萬里我想大秦拂菻古有名嚆人西去還東行定
北亦自指南出狡獪頗欲欺瞞盲英吉利當年入貢來神
京金表織字橫庚庚天地之毬測量精純廟度量越前

古卻珍不御歸蓬瀛英吉利邇來蝸角頗弄兵
挺銳逞弱爭貢市澳門烽火遙相驚往者不追來
不拒化外不遣王師征定北鍼能定北衆星共處
水流東會見梯航來萬國

秋日雨中過西華潭

西華潭路接銅街玉輦微波水一涯秋雨瀟瀟
人不見滿隄黃葉落宮槐

送家荔峯吉士南還

秋風驚作客夜雨夢還家弱弟經年病高堂兩鬢華
浮生感萍葉孤館憶梅花草草題書去歸心羨晚鴉

牧馬聞如故飛鴻劇可哀壯心羞對鏡瘦骨懶登臺
吾憶

吟詩侶

謂是生

君眞作賦才春明萬楊柳屈指盼同來

空庭獨立偶書所見

秋陰如夢紫苔肥
雨後新涼試袂衣
墮葉無聲簾不卷
斜風滿院白蛾飛

登蒼屏樓題壁

天涯難得暫同遊
人海茫茫有此樓
花影玲瓏三徑靜
雁聲寒壓萬家秋
登臨各有浮沉感
身世誰無俯仰憂
一笛西風二分月
凭闌重憶古揚州

攀條記向盧溝別
不上斯樓已兩年
黃葉漸疎秋雨後
青山仍繞畫簾前
山中萸菊懷諸弟
江上蒹鱸悵各天
曾與淮南共題壁
相思第一是琅嬛

歲暮寄懷曼兄並寄琅嬛諸子

記得河樓別春山正落梅君仍聽官鼓我尙滯燕臺寒夜
悲歌苦鄉心短景催遙知微雪裏東閣又花開
歲晚登樓望關山半落暉故人憐遠道遊子念寒衣樹老
慈烏喚天空斷雁飛旅懷如中酒爭得不思歸

宮中夜寒曲

玉壺蓮花澀龍子幙鳬抱煙飄不起長門魚鑰封古苔晚
雁切雲天在水金貌繡帳流蘇輕紅雪冷香凋畫屏曲巷
峭風入簾縫缸花夜笑搖暗燈空牀寶瑟影同宿冰絃無
聲裏秋玉燕支雙筋凝紅冰粒粒寒摧玉肌粟凍星流影
窺朱闌霜月上階明夜殘鸚鵡不眠喚羅幙金盤花碎滋
幽蘭翠被生寒夢銅輦二十五聲怨秋點複道笙歌方奉

恩鄭重芳年知夜短

哭仲弟壽蘇

四海茫茫一子由
謝庭花落不禁秋
青山埋骨君長往
白髮驚心我獨愁
風雨寒燈悲客館
江湖春水夢歸舟
深宵起向空庭立
一慟天河接淚流

少日文章已出羣
可憐薄福是聰明
大招碧落魂難覓
小集金荃著未成
慘澹世緣艱一第
支離病骨耐三更
傷心尙有名心在
兩字紅牙署再生

一夕秋聲斷雁行
西風揮淚哭他鄉
三千里外空回首
廿七年來此斷腸
池草綠銷尋夢地
燈花紅冷讀書堂
最憐余季曾封臂
瘦腊艱難尙裹瘡

弟病方劇季弟謙谷封臂和藥以進而卒不起痛哉

此事居然到眼前求醫禱佛枉經年孤兒向後皆吾事遺
棄他年定汝傳入夢祇應同隔世封書何處達重泉人生
修短真何事呵壁荒唐欲問天

浮名驅我復何之話到牀頭最可悲握手早防成永訣安
心強自說歸期天涯迢遞真無奈弱症纏綿那可支澹墨
欹斜淚重垂篋中留得贈行詩

秋老長安木葉疎羈愁終日感離居迴腸繞徧啼蛩夜疆
夢頻驚雁到初經歲羈棲遊子恨萬行涕淚老親書無窮
深痛終難寫蜀國哀絃恐未如

定陶鼎歌爲雲臺中丞師作

琅嬛仙館詩原序云西漢陶陵鼎以漢慮眈尺度

之高七寸三分身高四寸二分蓋高一寸六分蓋
上有三環各高一寸二分兩耳高二寸二分三足
高二寸銅質五色斑駁腹有稜純素蓋鑿隸書銘
大字十五曰隃麋陶陵其厨銅斗鼎蓋并重十一
斤小字四曰汧第卅五器鑿隸書銘大字十七曰
隃麋陶陵其厨銅鼎一合容一斗并重十斤小字
十六曰汧其厨銅鼎容一斗重八斤一兩第廿一
案漢書地理志隃麋汧二縣屬右扶風後漢書耿
弇傳建武四年封耿況爲隃麋侯續漢書郡國志
作隃麋誤也又續漢志定陶在濟陰郡本曹國後
漢屬兗州刺史部郭璞曰城中有陶邱史記云穰

侯山之陶卽其地定陶其王康元帝子哀帝父永
光八年自山陽徙封漢書丁太后傳建平二年上
曰太后宜起陵恭皇之園遣大司馬驃騎將軍明
東送葬於定陶貴震山東其王傳哀帝二年追尊
其王爲其皇帝水經注濟水自定陶縣南又東逕
秦相魏冉冢南又東北逕定陶其王陵此器云陶
陵是定陶其王陵也隃麋泝二邑其此器故曰其
厨銅鼎鐘鼎款識漢好時鼎銘云今好時其厨金
一斗鼎汾陰宮鼎銘云汾陰其官銅鼎上林鼎銘
云上林其官銅鼎漢器體制如是漢陵廟皆有厨
三輔黃圖昭帝平陵爲小厨裁足祠祝款識漢孝

成鼎銘云長安尉孝成廟銅三斗鼎是也此鼎蓋與器銘辭不相應者因有二鼎蓋與器互錯也器銘云并重十斤又云重八斤一兩云器重八斤一兩則蓋當重一斤十五兩矣今除蓋以庫平法馬稱之重五十三兩七錢二分銘云容一斗以今官倉斗較之得一升八合定陶故城在今山東曹州府定陶縣西南予得此鼎因思焦山祇有周鼎若以漢鼎配之經史引徵可增詩事爰以官牘達之鎮江府丹徒縣付焦山寺僧永守之竝加冊於櫝繪圖勅款鈐印備錄諸詩時嘉慶七年季秋月

扁舟兩度凌江湖海門浮翠隆然高中有周鼎三百載新

城兄弟誇詩豪片帆風利不得泊回頭雲樹迷單椒自別
江南走京洛黃塵十丈緇青袍老梅如雪照海水所思不
見心煩勞長安三月落花暮獨訪廟市搜錢刀翁宣泉趙
謙士太常老輩識奇字款識往往煩推敲雨窗獨坐恣清酌十
行玉札來雲霄語我金石有新得驚彝敦白鉶銷鐫十印
首列嘉月鉢溯自秦漢沿六朝就中更有西漢鼎篆籀堅
瘦窮秋毫其重十斤量二斗款曰陶陵應定陶陶隄所作
其歲祀赤堊百鍊殊鏐鏐漢制陵廟厨竝設鑄鼎用以資
燔炮汾陰好時銘具在金石三例精不淆王毓潛龍尊作
帝丁姬合祔埋珠珣票騎將軍東送葬桓桓司馬尊羣僚
起陵崇報禮所有祠官雍肅陳天庖嘶聲露眼賊莽惡壙

金欲令都尉拘寶器應有鬼神護不隨劫火同燔銷琅環
館中古金富此鼎一出空其曹客言寶滋宏世守綽綽眉
壽銘言褒子子孫孫永保用用示世德垂光昭主人聞言
曰否否煙雲過眼同浮泡焦山古鼎久無偶寶氣獨上騰
霞標以鼎配鼎義有取如兩劍合雙璧顧漢陵周廟竝典
重政以輕囊同譚露棄之桂檟襲重錦回云紋煥紅蒲桃
雁足鐙照鵲尾杓戟門開譙傾春醪賦詩爲饒衆賓和鴻
詞不數璫瓊瑤復有二跋劇該博譙山豈合仍稱熊孝然
之說眞附會明月寫出浮雲歔吏部說鼎未足據快犗足
破王西樵大江東去木葉下材官結束乘吳舫神光下燭
月華赤天吳蜺蜺不敢驕山僧昇兆應早得玉鉉黃耳占

厥絲枯木堂空海雲黑千秋寶物應神交華陽真隱去已
久山根片石噴洪濤名山從此增故事遺蹟豈獨胎仙翱
屬我題詩繼諸子刻燭一集紛傳鈔如魯嫁女齊致媵不
許藉口宗盟遙我生博古遜原父賦詩亦媿雕蟲雕朱張
王顧皆健者敢以後勁追前茅衙齋菜菔舊曾食和羹小
試鹽梅調此器晚出未得見似從燕趙思函嶠他年南歸
定相訪天風橫遂登松寥

原作

阮元

碧山一角浮春潮中有周鼎開雲猷古文十行照江水
百家詠釋窮秋毫千年古篆變爲隸西漢款識多鑿雕
我有漢鼎五十字隃麋泚鐫供定陶斗斤兼記古權量

顧道堂詩選卷三

六

汾陰好時同禮祧濟水東流帝陵起臣莽掘厨金不銷
齋中拭刷出古澤鼎雖轉徒猶堅牢煙雲過眼莫浪擲
送爾安穩棲松寥焦山古鉅觶爵其相餞雁鎧翦燭吟
清宵壬戌之秋木葉脫海門風起江飛濤蛟鼉踏浪避
金景蒼然古意生單椒此時此鼎入山去江天寶氣賡
輕艘海雲堂中多古木兩鼎爲耳初相遭周儀可補覲
禮闕周鼎呼史冊命之儀可補禮文漢事志傳徵班曹
倉籒字破鬼夜哭八分不似周王朝一波一磔湛水石
同隱有似由與巢胎禽仙去亦偶耳華陽銘尙鐫嶢嶢
可知古人皆好事以詩騰鼎各訂交他時得暇或相訪
雲帆一片橫金焦

文丞相祠

笙歌散盡築軍壇殘局支持事本難
九死自甘埋碧血當年原未乞黃冠
厓山風雨秋潮急燕市塵沙夜月寒
河嶽星辰終古在浩然元氣寸心丹

贈如意館畫士

大纛高牙十萬師征西諸將捷書遲
凌煙有閣無人上閒煞丹青筆一枝

桃花夫人詩書桃夫人廟碑後

卽息夫人也按列女傳紀楚伐息虜其君使守門
夫人與賦穀則異室之詩要以同死是夫人固以
死殉息侯與左氏所載異近徐闌齋撰桃花夫人

廟碑專據盲左子作此篇以矯之庶幾風人忠厚
之旨云爾

桃花不語含春煙花落辭枝春可憐花飛片片漢江曲桃
花自紅江自綠故君恩重何惜身巫山空說陽臺雲穀則
異室死同穴桃花淚染臙脂血美人死不嫁東風至今花
開成慘紅黯黯蒼梧雲一縷瀟湘竹枝啼夜雨

和簪花閣內史李晨蘭秋雁詩

冰絃急雪響平沙目送高飛入斷霞關塞相逢惟木葉江
天何處不蘆花月中人字排千點枕上秋聲落萬家一樣
悲涼驚旅夢新霜前夜入邊笳

牧馬依然未解圍江南空計稻梁肥五更風急斜銀漢萬

幕秋深冷鐵衣蜀道頻催陣合衡陽猶避戰塵飛天涯
迢遞西風急辛苦年年換燕歸

瀟湘煙景盡屏虛秋入高樓怨綺疏冰簟塵生人去後金
河風定夜涼初綠腰人卸銀箏柱素手親裁錦字書惆悵
征人三載別關心烽火近何如

鳳城南畔暮雲陰孤館背寒坐夜深千里飄零湖海夢經
年離別弟兄心雪泥渺渺空陳蹟雲水茫茫寄遠音君是
江南李秋雁題詩兼與譜瑤琴

余爲鐫秋雁詩人小印貽之

原作

琴河女史李佩金晨蘭

無端燕市起悲歌帶得商聲又渡河千里秋心隨月遠
一年愁緒入秋多水邊就夢雲無影天際驚寒夜有波

屈宋風流零落盡那堪重向洞庭過

晚來風雨曉來霜不爲悲秋也斷腸蘆葦作花多冷澹
鷺鷥無語亦淒涼途窮容易迷歸路棲穩何如在故鄉
一種白頭緣底事田田祇解覆鴛鴦

誰倚高樓一簾橫憑空吹落苦吟聲能鳴未必眞爲福
有蹟多嫌累此生入世豈容矜繳避就人終覺羽毛輕
越鳥楚乙休題品識字何曾爲近名

夜庭飛渡恨漫漫多恐江南到亦難偶聽弓絃驚寤寐
久疎箋字報平安寧無急往寧辭鼓琴有哀音未忍彈
可奈西風吹別調離羣還較此間寒

鄒縣畫眉塚是張京兆葬處

春柳千行碧春山一抹勻遙憐畫眉塚曾葬畫眉人

宣德古剎水歌

春山花氣凝仙露一甌古水前朝鑄玉斧何年記劃河金
滄當日勞飛渡淮甸龍飛海寓平六師分道命南征繡旗
傳檄梁王走水落昆池洗甲兵擺古遙通馬龍甸從此朱
波歸郡縣九隆不數漢家閒六詔猶傳唐代建宣慰分符
職貢多名香應不減芬陀土官鄭重金牌勘驛路郎當白
象駝六宮書靜春風暖玉纖小試金盆澆一著羅衣香不
消君恩較此知深淺甲煎龍涎未許誇明珠結乳玉生華
涼宵閒話返方事蠻女如雲採百花定知水亦非凡境不
汲龍潭汲寶井比著綢繆印較新玉顏一滴春冰冷中朝

勲戚沐餘芳恭順家曾有禁方枕頭溫席傳世廟御衣小
粧說純皇翫物精良復何有哥寧梅治都名手鴨鼎濃熏
鴛櫺香雞缸淺酌蒲桃酒香柏城遙控麗川威名黔國鎮
窮邊黃封續進洪熙歲金繒先頒永樂年五行妙理金生
水赤金爲表黃金裏鐫成細字辨毫釐三百年來亦如此
聽雨樓高易斷魂當時曾否入權門沉吟天水冰山錄欲
乞名香爲爾熏瀟滄萬里青蛉戍香濃還恐蒔薇妒當年
載筆問誰家南都尙憶春橋柳流落人間歲月徂深宮舊
事夢華胥此中便是銅仙淚一代金甌似此無

元夕偕家荔峯學士小筠羽林飲孫古雲襄伯百一

山房

今夕何夕明月明月明照徧長安城長安城中十萬家家
家爆竹催春聲珠燈豔照玉鉅碧主人置酒譙佳客哀絲
豪竹不成權自起狂歌拓金戟醉中乘月天街遊金波瀉
地寒不流誰家女兒踏燈去翠釧宮髻青貂裘繡簾不卷
梅花發故園今夕亦明月薦到椒盤少一人遠道難憑夢
飛越眼前主賓皆健者意氣行空若天馬詞臣地位最高
華儒將風流各都雅我思王沂公中禁聽宮漏蓮炬照揮
毫珠花滿衣袖亦有狄武襄軍令森刀鏤幕府正開譙已
奪崑崙關年來壯志如冰冷銀燭花寒照孤影已棄陰符
謝寶刀文武經綸讓公等窮途相見眼誰青話到升沉倚
醉聽簫鼓鄰家猶未歇月華如水滿中庭

崇效寺觀唐棣書寄弟妹

別家已三載旅食悲京華封書寄弟妹不看長安花城西
有古寺大道臨三叉乘醉一訪之僕夫戒巾車入門氣象
殊頗覺春光奢丁香碎紫纈牡丹殷紅芽棠棣尤韡韡鄂
耐爛朝霞詩人喻兄弟厥義正而葩偏我獨離居聽雨空
思家逝者隔重泉存者渺天涯仰視南歸雲花前空咨嗟
晚煙暖平楚已有歸飛鴉

燕臺送客

西子湖邊客東華道上人燕臺眺斜日吳苑夢殘春湖海
消英氣關山話戰塵何年酒壚畔同醉月華新

讀楊荔裳方伯

撰

西藏紀事詩並書廓爾喀紀功碑

後

方伯卓犖天人流坤輿慙徧輕九州籌邊祇今玉壘外參
軍憶昔青海頭青海迢迢三萬里分野天文符非鬼吐蕃
部落徧河湟兩_{一作}戒中分藏江水藏江水碧澄玻璃卑禾
地界西南夷班禪達賴彼所敬琳宮直接河源西本朝
幅輳邁前古國初早定遐方士恭繹仁皇御製文掃
蕩邪魔仗神武小醜無端肆陸梁修羅戈甲敢猖狂祇聞
劫火銷金地不見天龍護法王梵書呼救皇心怒輸臺
地重增兵戍河魁玉帳出甘涼上公秉鉞西征去書劔從
容絕域行君時奉詔許隨征甞辭粉署風流地去聽金
戈激盪聲沙渡繩行盡經歷肩鼻磨冰晨草檄北望伊犁

有斷雲茫茫一綫通戈壁此地從來最苦寒千年古雪玉
龍蟠怒江水惡皮船渡熱索橋高鐵馬盤月中刁斗聞傳
箭上將天威中七戰有 詔懷門許受降捷書夜奏 南
燕殿幾番慷慨看吳鉤闕盡風霜老敝裘一夜 黃封馳
驛騎貂蟬眞見出兜鍪雪山崖石橫天半大筆淋漓虹氣
貫寫到燕然第一功古來多少英雄羨我開此地古西羌
贊普和親說李唐九曲河西賜湯沐金城恰別鳳池鄉遺
蹟于今聞大詔當年楊柳空憑弓拓得聯盟甥舅拜奉春
遺智眞堪笑亦有軍中休暇期登臨投贈漫閒題憑將辛
苦三年事寫入蒼涼百首詩馬蹄踏徧崑崙足落日大旗
聞鼓角斷戈折戟未全消戰績依稀說年岳十曲黃人奏

凱旋金瓶從此靖西天祇憐戰骨埋荒草愁絕招魂路引
篇去從後藏歸前藏中土西陲尙東望戰地生還亦偶然
短衣孤劒偏神王頻年秦蜀未休兵君作屏藩在錦城聞
道紅旗催報捷應銷金甲勸春耕君家大謝才尤大謂蓉
裳農
部吟詩愛學西崑派也曾百戰障孤城中朝人物應稱最
豪吟如此古無人西望峩岷隔棧雲當作金經資日誦其
多葉寫佛香熏

西湖歸夢詩和錢謝盦吏部校

六橋楊柳曉啼鴉往事分明記夢華秋澗白噴龍井雪春
風紅上馬塍花西泠松柏埋蘇小南宋樓臺說趙家何處
酒壚堪貰醉竹梢輕颺一旗斜

最憶深宵載月遊，闌干四面水雲浮。
醉看星影連天遠，臥聽潮聲入海流。
漁浦秋燈移短棹，藕花涼露滴閒鷗。
池塘夢斷紅棠冷，愁絕湖邊第一樓。

舊約何堪願屢違，故山煙景最依依。
白魚上水晚波滑，黃犢出林春雨肥。
蘋葉綠絲牽野艇，桃花紅片點蓑衣。
西溪大可從漁隱，秋雪庵前好釣磯。

白來北地三年別，不寄西湖一首詩。
隱几青山君有約，盟心白水我無期。
曉風楊柳聞鶯早，細雨梅花放鶴遲。
同是春明羈滯客，各悲歸夢慰相思。

六月十二日蓉裳農部招集芙蓉館設祀宋黃文節公

終南仙館祀王局華陰雪照裴嶠綠廣陵近祀歐陽公蜀
岡花借芙蓉紅滄翁聲望後先埒海內何人祀文節詞壇
星斗森光芒好事復有毘陵楊名花一枝酒一斗主賓起
舞爲公壽酌酒勸公晉一卮賤子再拜前致辭西江詩派
誰所作似此淵源殊簡略宋興以來此一人史臣實誤知
無因文章萬世公論出絕後空前一枝筆不學公詩知愛
公心賞豈與他人同人生大節在忠孝落落數公翼名教
更從遺像瞻音容雙眸炯炯雙頤豐公生慶厯歲乙酉來
年七百更餘九

秋日讌集城西金氏園

出郭無三里林亭第幾家涼煙起孤樹秋色澹疎花略約

低紅版梁恩損碧紗春遊諸士女曾此駐香車

平川四面開佳日共登臺落葉紛紛雨秋陰漠漠苔風前
人欲別天外雁初來良會知難得相看酒一杯

一水環寒碧臨流欲種魚殘荷隱橋密瘦竹入簾疎畫好
憑闌讀詩成倚壁書茫茫人海裏較此定何如

青山與斜日都在古垣西殘暑蟬猶噪新涼鳥亂啼酒醒
思夏簾花落憶春泥寂寞羅袈遠歸程信馬蹄

松筠菴與家默齋夜話兼詢素山近狀

落葉辭寒樹秋聲滿鳳城他鄉燈火夜中歲弟兄情待月
頻傾酒觀潮憶論兵迴思水仙閣短夢抵三生

猿臂成功少蛾眉晚嫁多世人空自好之子竟如何骨肉

交眞魏英雄氣易磨遙憐滄海上獨夜望明河

彰義門外訪長平公主墓詩

鳳城芳草暗連天穠李飛花冷墓田家國已更龍漢劫滄
桑曾見鵲橋填蘭摧蕙折成千古玉瘞香埋又百年石馬
無聲蟋蟀語夜深殘月弔金仙

河山如夢客消魂黃土深深葬淚痕賸有瓊姬甯白石可
憐蕭史泣青門宮花御柳前朝夢粉確脂田異代恩愁絕
年年寒食節更無麥飯酌芳樽

碧血淒涼御劒揮傷心往事出宮幃高臺當日乘鸞去華
表何年化鶴歸一代春殘隨逝水三生夢短悵斜暉貞魂
祇合成精衛銜石年年碧海飛

金鑾蕭瑟冷魚燈玉女殘碑問故僧燕代河山賸坏土漢

家宮闕見觚稜張衡誅筆悲京華

張震有長平公主誄

吳質詩篇感

廢興

梅邨有長平公主挽詩

一路蘼蕪花作雪隨風綠上十三陵

送人出塞

大漠生煙落日平黃河西上繞孤城蒲桃酒熟琵琶急唱

煞陽關第四聲

甘草黃 御馬歌

鉛山蔣大令

即讓

集中有此題感其事而賦之

木蘭秋早百草霜千乘萬騎開圍場天閑以外出神駿樂
府又歌君馬黃君馬黃臣馬白臣馬特勒驃君馬好頭赤
三升豆箕一斗粟誰識龍駒困芻秣可憐湯火逃衣薪干

金之價賈一絀鹽車負輓已知遇敢期拂拭來風塵豈知
遭際真難料頃刻雲泥判悲嘯至尊一顧萬人驚獨立
天衢惜光耀旌門笳鼓風雲開塞山萬壑青崔嵬凡駟力
盡老驥踏河西三萬皆庸材出色駸駸善升爨需才不暇
三花翦暮辭鼎鑊出橫門朝拂翠華陪玉輦直上三休閤
蹀行瑤池歎玉盡知名連雲玉帳龍旗外耿耿房星徹夜
明從知顧盼君恩重聲價居然匹麟鳳不是人間個儼
才難供天上馳驅用變化飛騰事更奇伐毛深入浴龍池
風髮霧鬣從矜飾不似當初樵枿時苑柳入告哀哀喜
此後功名論萬里回首風沙寂寞時長嘶獵獵悲風起君
不見嘶馳之士亦如此

秋夜聞蓬

遠笛哀秋帶夢聽流螢飛上畫羅屏紅闌干外天如水一
抹銀河幾點星

寄曼生兄粵中時在那制軍幕府

銅柱扶桑遠建標鯨鯢跋浪勢方驕將軍威望兼三鎮節
度班行冠百僚海上談兵春浪闊枕邊草檄夜燈燒有人
憶爾燕臺月桂管山川未寂寥

觀馬楚復溪州銅柱拓本書後

五代時楚馬希範與溪州刺史彭士愁立誓範銅
爲柱命掌書記李宏皋作記在辰州溪蠻境上
國朝雍正七年改土歸流屬今保靖縣界宋竹垞

有溪州銅柱記二跋吳任臣十國春秋詳載其文
與今本譌數十字蓋未見拓本也此本爲彭尙書
元瑞所藏乃前年王師平辰州苗從軍中拓得
者雲臺師舊有此作因成是篇

漢家伏波定交趾是立銅柱森南天海界柱三山界五樹

之象浦垂龍編

伏波銅柱一在憑祥州思明府南界一在欽州分佈嶺東界又於林邑北岸立三銅

柱爲海界林邑南岸

安南都護志繩武雙柱突兀銘唐年

立五銅柱爲山界

唐安南都護馬總建五代十國競割據帶甲滿地橫戈鋌

將軍後裔鎮江漢威名伯仲錢塘錢寶規繼立天瑞應樓

臺十六名山川溪州刺史世豪傑軍聲遠達牂牁邊天策

上將臨中權銀鎗都摩山梁嶺金凋玉砦盡尊服誓書遠

送軍門前遠法乃祖鑄銅柱前功克篤軍威宣金蓮才人
李學士鴻詞深刻雲龍旋高丈三尺重五千石臺四面花
間蓮前年仲苗起楚粵吳石蛭驅相鉤連房竹以西盡戍
壘耶襄直北皆烽煙天兵雲集諸將會南征霖雨經三
年畢公沉姜公晟遷安集攻心上策師凱旋同時南籠亦
奏捷前軍已縛王褒仙此柱久晦適出土刀鏤誰叩銅花
鮮竹垞昔得葉氏本校覈同異精言論延陵補史惜未見
以果譌曷愁譌然南昌尚書志慕古寶藏金石畱丹鉛改
土歸流聖代事三記考證尤精擘我師攜歸示我讀點
畫破碎文章全天福五年月夏五鑄成定有豐隆鞭摩挲
紙本三太息龍頭駁尾識可憐越略何須問銅鼓蒼梧無

事徵銅船金人鐵馬同雕鏤補入歐趙曾洪篇

題王春汝金鼇玉嶼畫卷二十首

新漲金鼇活晴雲玉嶼眠峯巒屏上影臺榭鏡中天水氣
金隄溼松陰碧殿圓偶然騎馬過也抵小遊仙

枯柏森仙嶂芭蕉隔禁園遙瞻壽皇殿近繞福華門花
近紅雙影雲堆翠一痕何須問羣玉冊府是西崑

聖孝尊文母琳宮爲祝釐佛煙縈寶篆仙露結靈芝鳳
輦慈雲護龍舟翠水移蟠桃三百樹紅徧萬年枝

蓬萊前殿外南望是瀛臺禁旅嬉冰至詞臣侍直來雲山
隨地湧圖畫自天開歸院聯鑣過誰爲作賦才

太液波如海仙遊識帝家柳低人字樹蓮長並頭花鴈

鸞嫋簫鼓魚龍識翠華綠知明鏡裏曾此照宮鴉

對面瓊華島天然好畫圖重欄俯闕殿仙境卽方壺秋意
涼新得春陰澹欲無迴環三海水面面麗金鋪

玉樹涵春室珠簾寶月樓一鷗閒細雨雙鶻下新秋禁柳
分黃綬宮花襲紫裘親藩恩最重曲宴侍宸遊

珠斗橫河漢祥煙護紫宸水風吹作雨落月澹如塵柳影
迷金勒荷香擁畫輪紅燈花外過知是早朝人

白塔中天起青山上幾盤層層迴石磴面面出紅闌法雨
飛金界和風靜鐵竿黃圖千萬載烽火祝平安

聖武超前古圖形說紫光麒麟原有種貔虎久成行蜀棧
猶聞戍秦軍尙裹糧洗兵應漸近星影掃機槍

玉甕春苔洗金盤碧露濃
畫長浮水箭風定隔花鐘
劃界銀潢阻迴瀾紫海重
畫橋香不斷處處長芙蓉

嵩呼聞萬歲平揖景山齊
梨樹唐宮北櫻桃晉苑西
遙連春雨暗近接片雲低
風起紅棠暮飛花散滿隄

一鏡明于畫輕冰暖易消
波涵金海闊源溯玉泉遙
春月蠶神廟秋星織女橋
舊聞經考定圖繪證前朝

話到前朝事蒼茫百感生
金吾控西苑鐵鎖繡南城
復辟功何大迎藩獄未平
鷺鷥波上走懷古若爲情

亦有長生意高元舊殿增
仙壇沉玉磬寶樹禮金燈
緘合盟空設豐碑字有稜
青詞誰最好祇合相公能

誤說蕭家事妝臺舊夢非
二人間坐蹟一月寫明輝
丹井

鶯花老溫泉燕麥稀廣寒殘曉在空弔李宸妃

采芳開別館金屋貯娉婷荒譙天魔舞添妝臘粉亭飛樓
臨水起畫簷隔船聽遺錄傳蕭氏簪毫定此經

艮嶽黃封石何年著此間西華開苑囿北宋惜江山螺髻
盤空勢蛾眉對仗班千秋作殷鑒豈獨在完顏

最憶逢寒雪微吟此地過馬蹄香土少鸞尾落花多瑤島
眞如此瓊林更若何宮梅開幾樹江左笑紅羅

林密全疑雨煙輕欲化雲詩情虞學士畫本李將軍金碧
樓臺合丹青界畫分王郎好身手弄墨寫斜曛

阿禧曲和趙璞函娥隅集中作

東寺花幢梵聲起馬蹄逸矣平章死千秋遺恨泣韶顏一

片清冷橋下水段家九葉擅雄才親爲梁王百戰來已見
紅軍歸蜀道俄聞玉女降秦臺秦臺明月夜當年燭暗雙
花開笑語蒼山嵐暖鬱朝雲洱海波春蒸暮雨雨雲暮暮
復朝朝翠被濃香夢不消甲帳健兒橫鐵篋丁簾侍女按
瑤簫甲帳丁簾行樂地魚腹有人傳錦字鴛鴦獨宿亦無
繆屏唯春雨悲捐棄七星關外認歸程舊侶難忘故劒情
孤坐肉屏聽鐵立果然小別抵三生碧雞金馬無傳箭重
來祇爲新婚戀方幸蛾眉百歲齊誰知雀膽中宵變願其
雙飛返故林夜深苦口說丁寧可憐兒女更番勸爭奈英
雄不肯聽來朝聞變驚魂碎黃泉雖誓身難代佛塔煙中
哭鬼雄蠟磯心事真無奈雲片波潸弔影孤雁門夢斷泣

鳴鳴從臣更惜楊淵海靈草難尋押不蘆西師重襲仍難
制呼救空勞走書幣虎子雖堪此日言狙公應悔當年計
已卜天心眷建康眼看走死笑梁王菜坪華岫知何處春
草殘基弔夕陽玉案山平險難控花暗銀稜亦如夢南征
望重顧川侯不容故事依唐宋祇有僧奴志不移復仇心
事託題詩至今金甌江山外尚有烏蠻說繡旗

擬唐人塞下曲讀劉昫舊唐書作

賀蘭山外是天山赤嶺碑前漢使還昨日分疆駱駝嶺今

朝畫界鳳林關

永泰三年以鳳林關爲界建中四年以略定嶺爲界見吐蕃傳

萬里秋風一夕生邊人牧馬夜無聲茫茫青海連天碧一

角龍駒島上城

青海周圍八百里有小山至冬放牝馬於其上言得龍種見吐蕃傳

弓絃膠折戍旗翻大磧西橫界兩蕃積石山高鳥海遠征

人回首望河源

吐谷
渾傳

萬里無塵靖朔風七星橫絕夜當空燭龍洲畔龍銜燭弓

月城邊月挂弓

萬重翠嶂雲中落一綫黃河天際來昨過燕然都護府單

于秋色滿高臺

於故單于臺置燕然都
護府統之見迴紇傳

兩察分兵萬馬騰五回道遠度峻嶒相王自領天兵道不

似當年白馬僧

長壽二年命懷義爲總管領十大將軍以
討之久規元年相王且爲天兵道元帥未

行而賊退
見突厥傳

磧南磧北路茫茫處處青燐古戰場昨向拂雲祠畔過受

降城上月如霜

張仁
愿傳

馬保城頭畫角哀熊津江上陣雲摧將軍身是擒王手又

縛瑤池都督來

突厥傳 蘇定方傳 百濟傳

巖城高踞竟無憂四鎮風高倖葉秋一夜徧傳飛鳥使西

川節度出維州

吐蕃傳 韋皋傳 飛鳥使謂中國驛騎也

雞林都督領東方姊妹承恩異姓王別有天孫雲杼手回

文織錦貢皇唐

國王真平無子女善德真德繼立永徵元年真德破百濟織錦作五言太平頌以獻

見新

羅傳

香車春暖度洮河西海名王部落多身是唐家天子陪陪

臣奉表獻金鷄

貞觀十五年弄獢獻金鷄高七尺實酒三斛見吐蕃傳

將軍三箭定天山渡海樓船劒氣寒已破蓋牟降僭薩傳

烽一夜達長安

高麗傳 薛仁貴傳

青海河源玉女家天山橫黛接龍沙玉關春色來天地新

勅闕氏號麗華

肅宗以僕固懷恩女嫁迴紇可汗冊為麗華光親麗華可敦見迴紇傳

阿育王城已劫灰五天竺國梵書開漢家詔使人如玉知

是摩訶震旦來

天竺傳

昆伽公主貌無倫翠帽珠衣馬上身域外亦師中國法上

書有女願和親

聖歷元年吐蕃有女請和親則天命武延秀就納其女默啜拘之見突厥傳

真女威儀稱可敦春迴牙帳翠旗溫琵琶少婦燕支色為

逐香車入玉門

范元元年詔以幼女寧國公主出降回紇使三婦人謝聘見迴紇傳

玉門關外柳千條春入桃花叱撥騎一自金城公主過長

條爭學內人腰

長安二年以雍王宗禮女為金城公主許嫁贊普見吐蕃傳

坦駒高嶺勢嵒巖勃律西頭弱水遙隔斷吐蕃三萬騎將

軍昨夜斷藤橋

高仙芝傳

南康節相最知兵，梨樹無勞更續盟。塞貢獵城九節度，一

時全部盡歸誠。

貞元十六年吐蕃襲貢獵城九節度降於韋皋見吐蕃傳

悶懼廬川磧尾浮三山，天外暮雲秋使臣。大有乘槎意來

往黃河最上流。

劉元鼎充西蕃盟會使往來渡黃河上流有三山形如鐵河源在其間見吐蕃傳

元菟城西月上絃，詔收戰骨瘞荒煙。樂浪曾識羸秦事，新

築長城到海邊。

貞觀五年詔毀高麗所立京觀高麗懼築長城千有餘里西南至海見高麗傳

奚部知同霅部鄰，桂婁松漠接燕雲。尙書自領金河道，都

護新懸黑水軍。

處密師連撥，換城安西四鎮。詔移兵玉關，揚旆天山雪。併

入邇茲蓬裏聲。

通鑑傳

久戍黃龍不憶家葡萄酒熟聽琵琶天閑已貢延陀馬海

外新來活襍蛇

骨利韓貢良馬十疋太宗號爲十驥見鐵勒傳伊嗣侯貢一獸名活襍蛇見波斯傳

戊校屯兵蹟未孤華容公主玉顏殊高昌兵馬如霜雪抵

得唐家日月無

先是其國童謠云高昌兵馬如霜雪唐家兵馬如日月日月日照霜雪反手自消滅見

高昌傳

從故紙中得朝鮮李書記見和老松之作因併原作

及贈詩存之

未識何年種此松深山黛色老重重壽聲忽起夜驚鶴冷
甲欲騰春化龍但覺此身足生氣不知人世有嚴冬天門
風雨孤吟嘯秦鼻如來肯受封

嘉慶戊午冬日偶附星轅來遊上國敝友朴儀卿搆示

頤道堂詩選卷三

浙江陳君雲伯詠老松之作愛其氣格高異步韻奉和一首朝鮮國書記廣陵李光稷書於京師行館

有客揮毫賦老松筆端但覺翠重重踏餘屐寒霜枝鶴吟罷騫騰雨葉龍清韻已知擅朱夏寒心應不畏元冬晚來東海風吹急欲洗秦家襲日封

朝鮮書記李光稷以詩見貽署其籍曰廣陵蓋其國亦有揚州也因題一絕贈之

雲接扶桑萬里秋今從海外識揚州吟邊觸我江南夢三月煙花是舊遊

頤道堂詩選卷三